

Hidup Berdikari

Daripada al-Miqdam bin Ma'dikarib al-Kindi RA, Rasulullah SAW bersabda:

مَا أَكَلَ أَحَدٌ طَعَامًا قَطُّ خَيْرًا مِنْ أَنْ يَأْكُلَ مِنْ عَمَلِ يَدِهِ، وَإِنَّ نَبِيَّ اللَّهِ دَاوُدَ كَانَ يَأْكُلُ مِنْ عَمَلِ يَدِهِ.

Maksudnya: "Sesungguhnya sebaik-baik yang dimakan oleh seseorang ialah hasil pekerjaannya sendiri. Dan sesungguhnya Nabi Allah Daud memakan dari hasil kerja tangannya sendiri."

Riwayat al-Bukhari dalam *Kitab al-Buyu'* (2072)

Pedoman dan Iktibar Hadis

Antaranya:

1. Alam dicipta oleh Allah SWT bersifat konseptual, iaitu ia boleh difahami, diolah dan disusun kembali. Atas sifat tersebut, ia diserahkan kepada manusia dengan melengkapkannya dengan pelbagai kebolehan menerusi penganugerahan akal, keupayaan menerima dan mengembangkan ilmu pengetahuan.
2. Diri manusia dan bahan-bahan yang terdapat dalam alam ini, sedia untuk dibangunkan, dikembangkan, serta dimanfaatkan. Antara nikmat Allah SWT yang terbesar kepada manusia ialah Allah SWT menjadikan alam ini bersedia untuk dimanfaatkan oleh manusia dalam lingkungan tugasnya sebagai khalifah. Allah SWT berfirman:

هُوَ أَنشَأَكُمْ مِنَ الْأَرْضِ وَاسْتَعْمَرَكُمْ فِيهَا

Maksudnya: *Dialah yang menjadikan kamu dari bumi (tanah) dan menjadikan kamu pemakmurnya.*

(Surah Hud: 61)

3. Untuk membolehkan manusia memainkan peranan mentadbir bumi Allah SWT dalam lingkungan tugasnya sebagai khalifah, mereka mestilah membangunkan diri dan melengkapkannya dengan pelbagai keupayaan. Oleh kerana memahami, menyusun dan mengolah kembali alam ini, tidak dapat dilakukan melainkan dengan ilmu, maka manusia mestilah melengkapkan dirinya dengan ilmu pengetahuan.
4. Manusia mestilah menggerakkan potensi diri yang dikurniakan oleh Allah SWT lalu mengembangkannya untuk tujuan pembangunan. Ini bermakna manusia mestilah menggunakan akalanya semaksima mungkin sehingga berfikir, berfikir tentang dirinya dan alam ini.
5. Potensi fitrah manusia perlu ditonjolkan, supaya berkembang menuju pembangunan dan bukan membawa keruntuhan. Sikapnya, keinginannya, perasaannya mestilah dikembangkan berasaskan kepada nilai-nilai murni dan dibangunkan mengikut acuan yang sesuai dengan tuntutan pembangunan menuju kesempurnaan insaniah dan kemanusiaan.
6. Oleh kerana manusia itu sebahagian daripada alam, maka pembangunan alam, mestilah selari dengan pembangunan manusia. Kepincangan akan berlaku, sekiranya pembangunan alam tidak selari dengan pembangunan manusia. Bangunan-bangunan indah dan tinggi dengan peralatan canggih, tidak bermakna jika penghuninya ialah manusia yang rosak akhlaknya, rendah perasaan kemanusiaannya, rakus perasaannya dan tidak bertamadun daripada segi sikap dan kelakuannya.
7. Manusia yang membangun ialah manusia bertamadun. Manusia yang bertamadun ialah manusia yang tinggi daya pemikirannya, teratur dan tersusun kelakuannya, berbudi bahasa, berjiwa maju serta hidup beradab dan bersistem.
8. Manusia yang bertamadun juga ialah manusia yang seimbang dan jauh pandangannya. Jangkauan pandangannya tidak hanya sekadar di dunia tetapi juga di akhirat, begitulah sebaliknya. Mengimbangi kehidupan duniawi dan ukhrawi adalah sifat manusia yang bertamadun. Ini kerana pandangan yang seimbang akan melahirkan manusia yang tidak rakus di dunia dan tidak pula

pasif dan beku. Ia akan bersifat sederhana, tidak melampau dan tidak jumud. Kesederhanaan adalah lambang keharmonian perasaan. Ia juga menjadi tanda kesejahteraan.

9. Manusia yang mempunyai pandangan seimbang, sentiasa berusaha bagi menjamin kebahagiaannya di akhirat tanpa mengabaikan nasib dan tanggungjawabnya di dunia. Ia membangunkan bumi dengan penuh kesungguhan, tetapi tidak pula lupa daratan dan sentiasa beristighfar kepada Allah SWT yang menciptakannya kerana dia tahu bahawa dia akan kembali kepada Allah SWT.
10. Manusia yang seimbang sentiasa yakin bahawa tanggungjawabnya membangunkan bumi adalah dalam lingkungan ibadah kepada Allah SWT. Ia mencebur diri dan bergiat dalam perniagaan, perusahaan, pertanian dan sebagainya semata-mata kerana ibadah kepada Allah SWT. Manusia yang seimbang, berusaha membangunkan bumi ini, dengan penuh keinsafan dan kesedaran bahawa bumi ini adalah amanah Allah SWT. Apa sahaja usaha pembangunan yang dilakukan ia mestilah menjurus ke arah kebaikan berdasarkan ilmu. Justeru itu, pembangunan yang dilakukan hendaklah berdasarkan prinsip-prinsip tertentu:
 - i. Menjauhi pembaziran dan mengelakkan diri daripada bersikap rakus terhadap alam.
 - ii. Sentiasa memelihara dan menjaga alam supaya tidak rosak binasa. Umpamanya, kerja-kerja pembalakan tidaklah sehingga menyebabkan keringnya sungai-sungai. Caranya ialah dengan menetapkan dasar bahawa pembalakan tidak boleh dijalankan di tempat-tempat tadahan air dan di hulu-hulu sungai. Ini kerana kerosakan alam semulajadi akan membawa bencana kepada makhluk Allah SWT dan kepada kehidupan manusia sendiri.
 - iii. Membangunkan bumi, adalah untuk kesejahteraan manusia dan bukan semata-mata kerana pembangunan. Oleh sebab itu, dalam usaha pembangunan, hendaklah terlebih dahulu difahami, aspek manakah yang benar-benar membawa kesejahteraan manusia, pemeliharaan maruah dan kehormatannya. Ini kerana tidak bermakna pembangunan jika ia membawa penderitaan kepada manusia.
 - iv. Pembangunan hendaklah dilaksanakan untuk kepentingan ramai bukan untuk segelintir manusia serta mencabuli hak-hak majoriti dan makhluk Allah SWT yang lain.

- v. Pembangunan mestilah berhemat dan sentiasa berpegang kepada kesederhanaan.
- vi. Pembangunan mestilah sentiasa berpandukan kepada keadilan ke arah keadilan adalah teras kepada kesejahteraan. Tanpa keadilan ia akan menyebabkan kemurkaan Allah SWT, seterusnya merosakkan kehidupan manusia dan alam sejagat.

Mutiara Hikmah

- ❖ **Pujangga berkata:** Orang yang berhati-hati akan berjaya mencapai apa yang dicita-citakannya, dan orang yang selalu berusaha berbuat baik akan mendapat kemenangan. Sikap terburu-buru adalah kemandulan dan keinginan adalah kemuffisan.
- ❖ **Pujangga berkata:** Indahnya kemenangan akan menghapus getirnya kesabaran, nikmatnya kemenangan akan menghapus semua keletihan, dan kerja yang cermat akan menghapuskan rintangan yang akan dihadapi.

Kisah Teladan

Khalifah Umar Ibn Abdul Aziz menghapuskan sikap pilih kasih, rasuah dan akhlak yang mazmumah. Beliau juga membuktikan dirinya benar-benar sebagai pengganti Rasulullah SAW. Sebaik sahaja menjadi khalifah beliau mengeluarkan arahan-arahan panjang lebar yang lebih menekankan pembaharuan moral, akhlak dan agama daripada hal ehwal pentadbiran semata-mata.

Dalam surat-suratnya, beliau membandingkan keadaan sosial dan moral rakyat di zamannya dengan keadaan yang wujud pada zaman Nabi SAW, dan para khalifah yang awal, serta menghuraikan sistem pentadbiran dan kewangan yang diperlukan untuk menghidupkan Islam semula dalam masyarakat. Beliau menekankan kepada para gabenor dan panglima perang mengenai kepentingan sembahyang tepat pada waktunya serta mengimamkan sembahyang berjemaah tersebut.

Beliau mengingatkan kakitangan awam supaya meningkatkan takwa mereka dan menjunjung perintah Syariah. Beliau mempertanggungjawabkan pegawai-

pegawai beliau dengan tugas menyebarkan Islam di daerah-daerah pentadbiran masing-masing. Beliau menganggap penyebaran risalah Islam tersebut sebagai tujuan tunggal wahyu Allah dan kenabian Muhammad SAW.

Beliau menyuruh yang makruf dan mencegah yang mungkar serta memberi amaran mengenai kesan buruk daripada kegagalan menunaikan tanggungjawab menyuruh yang makruf dan mencegah yang mungkar tersebut.

Umar Ibn Abdul Aziz juga menghuraikan undang-undang jenayah dalam Islam serta menyuruh para qadi supaya bersederhana tatkala menjatuhkan hukuman. Beliau menarik perhatian terhadap penyelewengan dan bidaah, adat istiadat dan tradisi asing yang telah meresap ke dalam kehidupan masyarakat. Beliau mengharamkan perbuatan meratap yang berlebihan dan memberhentikan amalan yang menghendaki kaum wanita menyertai perarakan jenazah serta kehadiran mereka di khalayak ramai. Beliau mengutuk sifat berpuak-puak, serta mencegah kecuaiian dalam penggunaan air perahan anggur yang membawa kepada majlis minum arak dan kemungkaran yang lain.

